

Tico Croes ta indica con situacion na Aruba ta basha abao

CU 250 MIYON DOLLAR CADA CAS NA ARUBA POR HAYA 30 MIL FLORIN

ORANJESTAD (AAN): "Ta evidente cu e Gobierno aki a perde tur contacto cu Pueblo y ta na un distancia completo for di Pueblo. Esaki a sali dilanti den e fiesta cu Gobierno a bay tene pa celebra e acuerdo cu Gobierno a firma cu Lago. E fiesta aki a fracasa pasobra Pueblo no por comprende con un Gobierno cu ta bisa cu e ta traha pa Pueblo por a regala 250 Miyon Dollar na un multinacional."

Esaki ta palabranan di Tico Croes. E Miembro di Staten pa AVP a mostra cu recientemente e comision di Staten pa asuntonan di exterior a reuni cu representantenan di e organisacion internacional di trabao ILO. E organisacion a bini Aruba pa orienta su mes encuanto calidad di leyman laboral na Aruba y tambe di e situacion socio economico.

Tico Croes a mostra cu durante e reunion a resalta e elogio cu e representantenan internacional tabata tin pa e recuperacion social economico di Aruba cu a bay asina rapido. Nan admiracion ta basa no solamente ariba e magnitud di e crisis di Lago pero tambe con un pais sin materia prima a sa di lanta para for di crisis.

"Atrobe por scucha expresionnan di representantenan internacional cu ta elogia e forma con Gabinete Eman a saca Aruba for di crisis" Tico Croes a duna di conoce. El a lamenta cu awor situacion ta basha abao atrobe pasobra e actual Gobierno a perde su contacto cu Pueblo y ta goberna e pais na un forma asina aleha di Pueblo.

"Gobierno no ta comprende kico ta biba cerca Pueblo. Gobierno Oduber no

ta tene cuenta cu e sentimentonan di Pueblo y e situacion cu Pueblo ta biba aden" Tico Croes a bisa.

El a mostra cu e 250 Miyon Dollar cu Gobierno a regala na Exxon/Lago por a cubri hopi necesidad di Pueblo. Si a parti e suma aki entre tur familia na Aruba cada cas na Aruba lo por a ricibi e suma di 30 Mil Florin. Si tene cuenta cu scarcedad di cas ta causante di tanto problema social na Aruba lo por comprende cu 30 Mil Florin lo a permiti esnan cu mester di un cas construi nan cas.

Gobierno por a haci hopi cu e 250 Miyon Dollar cu el

a regala Exxon/Lago manera Tico Croes a mostra. El a papia di e posibilidadnan cu tabata tin pa usa e 250 Miyon Dollar aki pa fondonan pa Pueblo si no tabata kier a repartie directamente entre ciudadanonan.

Cu e suma aki lo por a paga pa hopi aña e parti cu Gobierno awor ta paga pa cubri gastonan di enfermedad di esnan sin entrada y cu mañan Pueblo mester cubri den e Ley di Aseguro Medico General. Gobierno lo por a construi un planta di awa y coriente nobo sin ningun debe loke lo a significa cu prijs di awa y coriente lo no mester a subi pasobra

mester financia un planta nobo.

Tico Croes a indica cu si a pone e suma aki na banco mes como un reserva pa cualquier necesidad grandi lo por a cobra e interes y usa esaki pa un fondo general di pensioen y pa aumenta pensioen y onderstand. "E hecho cu Gobierno a regala Exxon/Lago 250 Miyon Dollar ta demostra desprecio pa e Pueblo y un falta total di atencion pa necesidadnan di Pueblo cu Gobierno Oduber a haci pover mientras AVP a traha duro pa Arubianonan por goza di un pais di bienestar" Tico Croes a termina bisando.